

दिनांक 30.05.2025

समय: 18.45 बजे

आकाशवाणी जयपुर—अजमेर

प्रादेशिक समाचार

○ प्रधानमंत्री नरेन्द्र मोदी कयो—आतंकवाद रे खिलाफ भारत री हमेश लड़ाई चालती रहवेला।

व भाजपा रा राष्ट्रीय अध्यक्ष अर स्वास्थ्य मंत्री जगत प्रकाश नड्डा रो काले जयपुर आवण रो कार्यक्रम—न्यारा न्यारा आयोजनां मांय शिरकत करेला।

व राज्य मांय नकली खाद बणावण अर बेचण वाळां री गहराई ऊं जांच कराई जाएला।

व भरतपुर पुलिस 400 करोड़ रिप्या री साइबर ठगी रा मामलां मांय गैंग रो पर्दाफाश करता एक सदस्य ने गिरफ्तार कर्या।

000

प्रधानमंत्री नरेन्द्र मोदी कयो है के आतंकवाद रे खिलाफ भारत री लड़ाई हमेश चालती रहवेलां श्री मोदी कह्यो के भारत रा बलां पाकिस्तान री वायु सेना रा बूता ने ध्वस्त कर दियो। ओ नुवा भारत री ताकत रो प्रदर्शन है।

प्रधानमंत्री कयो के आतंकवाद होवे या नक्सलवाद, देश रा दुश्मनां ऊं तेजी ऊं फैसलाजोग निपट्यो जाएला। शांति, हिफाजत, शिक्षा अर विकास गांव—गांव ताई बिना रुकावट रे पूगेला। श्री मोदी आज बिहार मांय एक जनसभा मांय बोल रिया हा। वणा कोई साढे 48 हजार करोड़ रिप्यां री न्यारी—न्यारी विकास परियोजनावां री नींव धरी अर लोकार्पण कर्यो।

000

गृहमंत्री अमित शाह आज जम्मू कश्मीर मांय पुंछ नगर रो दौरा करयो। वणा ऑपरेशन सिंदूर मांय पाकिस्तान कानी ऊं व्ही गोळाबारी ऊं सम्पत्ती अर धार्मिक ठोड़ां ने व्हीया नुकसाण रो जायजो लियो। श्री शाह कह्यो के हर आतंकी हमला रो करारो जवाब दियो जावेला। गृहमंत्री अर ठावा हिफाजती अहलकारां पाकिस्तानी गोळाबारी ऊं पीड़ित पिरवारां ऊं मिल्या। वणा पीड़ित पिरवारां ने रोकड़ मदद ई दी। वटै ई गोळाबारी मांय मारी ज्या लोगां रा पिरवारजनां ने नियुक्ति रा पाना ई संप्या।

000

भारतीय जनता पार्टी रा राष्ट्रीय अध्यक्ष अर स्वास्थ्य मंत्री जगत प्रकाश नड्डा रो काले एक दिन रा दौरा माथे जयपुर आवण रो कार्यक्रम है। श्री नड्डा राजस्थान इंटरनेशनल सेंटर मांय होवण वाळा सरकारी कार्यक्रम मांय हिस्सो लेवेला। इण मांय न्यारी-न्यारी योजनावां रे तैत महिलावां अर बालिकावां ने रकम हस्तांतरित करी जाएला। साथे ई न्यारा-न्यारा विकास कामां रो लोकार्पण अर शिलान्यास ई कर्यो जाएला। इण रे पछे वे अहिल्याबाई होल्कर री 300वीं जयंती रे मौके होवण वाळा जळसा मांय हिस्सो लेवेला। कार्यक्रम मांय अहिल्या बाई होल्कर माथे नाटक खेल्यो जाएला अर संगोष्ठी व्हेला। कार्यक्रम मांय राज्य सरकार रा मंत्री, विधायक अर जननुमाइंदा ई हिस्सो लेवेला।

भाजपा प्रदेश अध्यक्ष मदन राठौड, प्रभारी राधामोहन अग्रवाल अर दूजा नेतावां आज आयोजन थल रो दौरा करने तैयारियां रो जायजो लियो। दोपहरां पछे श्री नड्डा पार्टी रा ठावा अहलकारां रे साथे मीटिंग करेला, जिण मांय संगठन ऊं जुड्या न्यारा-न्यारा बूता माथे समीक्षा करी जाएला।

000

केन्द्रीय कृषि राज्यमंत्री भागीरथ चौधरी कह्यो है के नकली खाद बणावण अर बेचण वाळां लोगां रे खिलाफ करडी कार्रवाई करी जाएला। श्री चौधरी राज्य रा कृषि मंत्री डॉ. किरोड़ी लाल मीणा ऊं अजमेर मांय मिलण रे पछे मीडिया सामी बोल रिया हा। श्री चौधरी कयो के अन्नदाता काश्तकार ने नकली खाद बेचणो चिंताजोग मुद्दो है अर इण री जांच कराई जाएला।

ध्यानजोग है के राज्य रा कृषि मंत्री श्री मीणा काले अर आज अजमेर अर उदयपुर जिलां मांय न्यारी-न्यारी ठोडां खाद बणावण वाळी कम्पनियां ने देख्या, जिण मांय मोटा थर माथे गडबडियां सामी आई। केई ठोडां उर्वरकां मांय मिलावट ई उजागर व्ही। इण रे पछे आं कम्पनियां माथे खेती महकमा कानी ऊं कार्रवाई ई करीजी।

000

भारतीय खाद्य सुरक्षा मानक प्राधिकरण-एफएसएसएआई खावण री चीजां रा कारोबारियां ऊं लेबलिंग अर प्रचार मांय सौ फीसदी रा दावां ने काम मांय नी लेवण री सलाह दी है। इण ऊं उपभोक्तावां ने अंदेशाजोग भरमाऊ बतायी ज्या है। प्राधिकरण आज जारी एक सलाह मांह कह्यो सौ फीसदी शब्द काम मांय लेवणो आखी शुद्धता अर श्रेष्ठता री गलत धारणा पैदा होवण री आस रेहवे है।

000

000

भरतपुर पुलिस 400 करोड़ रिप्या री साइबर ठगी करण वाळी गैंग रो पर्दाफाश कर्यो है। ई मामला मांय पुलिस गिरोह सारू काम करण वाळा सदस्य ने गिरफ्तार कर्यो है। ओ गिरोह ऑनलाइन गेम अर ई-कॉमर्स रा नाम माथे करोडां रिप्या री ठगी कर रियो हो। इण रे साथे ही फर्जी कम्पनियां री मार्फत केई तरह री धोखाधडी कर रिया हा। पुलिस महानिरीक्षक राहुल प्रकाश खबरनवीसां ने बतायो के छह मार्च ने धौलपुर साइबर थाणा मांय ठगी री शिकायत दर्ज करवाई ज्यी ही। इण रे पछे शिकायत री पडताल करण माथे जाणकारी व्ही के इणी बैंक खाता रे खिलाफ पेला ई ठगी री हजारों शिकायतां दर्ज है।

000

राजस्थान बोर्ड री 5वीं कक्षा रा नतीजा आज ऐलान करी ज्या। नतीजा 97 दशमलव चार सात फीसदी रिया। शिक्षा मंत्री मदन दिलावर भीलवाड़ा जिला रा जहाजपुर ऊं वर्चुअल मार्फत अ नतीजा ऐलाण कर्या। ई साल 13 लाख 30 हजार ऊं बत्ती पढेसर परीक्षा दी ही। इण मांय ऊं 12 लाख 96 हजार 495 पढेसर कामयाब व्हीया। ई दौरान शिक्षा मंत्री कह्यो के आ नतीजा लाखों पढेसरां री मेहनत अर लगन री पिछाण है। वणा पास होवण वाळा बालका ने बधाई देवतां कह्यो के सरकार गुणवत्तापूर्ण शिक्षा मुहैया करावण री बरोबर कोशिश करे। शिक्षा मंत्री कह्यो के लारला कुछ सालां

मांय राज्य री प्राथमिक शिक्षा व्यवस्था मांय सुधार व्हीयो है। शिक्षकां री सिखावण, डिजिटल लर्निंग अर आधारभूत ढांचा ने मजबूत बणावण माथे खास ध्यान दियो है।

000

आवती 15 जून ने होवण वाळी राष्ट्रीय स्नातकोत्तर पात्रता-सह-प्रवेश परीक्षा-नीट-पीजी अवे एक पारी मांय ई कराई जाएला। सुप्रीम कोर्ट आज ई बारा मांय निर्देश दिया। न्यायमूर्ति विक्रम नाथ री सदरत वाळी पीठ अहलकारां ने निर्देश दिया के दो पारी री ठोड़ एक ही पारी मांय इम्तिहान करावण रा बन्दोवस्त करे। सर्वोच्च न्यायालय नीट-पीजी परीक्षा रा संचालन मांय साफगोई री कमी ने चुनौती देवण वाळी अर्जियां माथे सुणवाई करता अ हुकम दिया।

000

केंद्रीय संस्कृति अर पर्यटन मंत्री गजेंद्र सिंह शेखावत कयो है के भारत ने लेर आखी दुनिया री धारणां मांय मोटो बदलाव आयो है। भारतीय रेहवासियां मांय ई देश रे प्रति सकारात्मक बदलाव देख्यो जावे। श्री शेखावत आज नुवी दिल्ली मांय **भारतीय उद्योग परिसंघ के वार्षिक व्यापार शिखर सम्मेलन** मांय बोल रिया हा। केंद्रीय मंत्री कह्यो के देश रे सेलाणी हलको घणो विकसित व्हे चुक्यो है। घरू पर्यटन मांय मौकां री आस अंतर्राष्ट्रीय पर्यटन ऊं घणी बत्ती है। इण रे तेजी ऊं बधण री आस है।

000

राज्यपाल हरिभाऊ बागडे ऊं उपमुख्यमंत्री दिया कुमारी आज जयपुर मांय मुलाकात करी। राजभवन मांय व्ही ई भेंट रे दौरान वणा केई मुद्दां माथे बतळ करी। इण ऊं पैला उपमुख्यमंत्री इंडिया इंटरनेशनल डिजाइन कॉन्क्लेव रो उद्घाटन कर्यो। तीन दिन रो ओ राष्ट्रीय आयोजन राजस्थान इंटरनेशनल सेंटर मांय व्हे रियो है। ई मौके दिया कुमारी क्राफ्ट प्रदर्शनी ने ई देख्या। वणा नौजवानां री रचनात्मकता री सराहवना करी अर कयो के राजस्थान री कलात्मक परम्परा घणी मजबूत है। इण ने देश दुनिया ताई पूगावण सारू कोशिश करी जावणी चाहिजे।

000

अरब सागर ऊं आय री नम हवा रे कारण राज्य मांय आज केई ठोड़ां मौसम मांय बदलाव निजर आयो। जयपुर, हनुमानगढ अर करौली समेत केई ठोड़ां बादळ छाया रिया अर छांटा-छिडको व्हीयो। इण ऊं मौसम खुशनुमा बण्यो रियो। उठी ने बारां मांय दोपहरां पछे तेज हवा चाली। जिला रा केलवाडा अर सीसवाली मांय कुछ देर मूसलाधार बिरखा व्ही। श्रीगंगानगर मांय ई कुछ देर पहला मेह रो दौर सरू व्हीयो। ई बीचे चूरू अर बाडमेर मांय आज करड़ी गर्मी रो असर रियो। मौसम महकमो आज आंधी अर बिरखा री आस जताई है। फेरू ऊं आवता दो दिनां मांय आंधी अर बिरखा री गतिविधियां मांय कमी रा आसार है। वटे ई राज्य रा अगुणी हलकां मांय कठे ई कठे हल्की बिरखा व्हे सके है। ई बीचे 24 घंटां मांय श्रीगंगानगर, बीकानेर अर बाडमेर मांय हीटवेव रो असर रियो।

000

पुणे री राष्ट्रीय रक्षा अकादमी री पासिंग आउट परेड मांय आज 17 महिला कैडेट्स रो पेलो बैच भेळो व्हीयो। इण रे साथे ई 148वां कोर्स री अ परेड देश रा सैन्य इतिहास मांय एक खास कामयाबी हासिल करी है। ओ आयोजन देश सारू मान रो मौको है, जिण मांय पहली बार महिला प्रशिक्षु भारतीय सशस्त्र बलां मांय अहलकार ओहदा सारू तैयार व्ही है।

000